



Յայտարարութիւն

Հայկական աւանդական երեք կուսակցութիւններու տեղական ղեկավար մարմիններու կազմակերպութեամբ, Ուրբաթ, Սեպտ. 4-ի երեկոյեան Թորոնթոյի Հայ Կեդրոնին մէջ տեղի ունեցաւ համագաղութային հաւաք մը, որուն մասնակիցներուն կողմէ որդեգրուեցաւ բողոքի հաւաքական ներկայ յայտարարութիւնը

Հ.Յ.Դաշնակցութեան «Սողոմոն Թեւլիբեան» կոմիտէի, Ռամկավար Ազատական Կուսակցութեան Կեդրոնական Գանատայի Շրջանային Վարչութեան եւ Սոցիալ Դեմոկրատ Յնչակեան Կուսակցութեան Գանատայի Շրջանային Վարչութեան կողմէ կազմակերպուած եւ Թորոնթոյի Հայ Կեդրոնին մէջ կայացած ժողովրդային հաւաքի ներկաներս, կու գանք մեր բողոքը արտայայտելու Հայաստանի եւ Թուրքիոյ պատկան իշխանութիւններուն կողմէ Օգոստոս 31-ին հրապարակուած երկու երկիրներու դիւանագիտական երկկողմանի յարաբերութիւններու բնականոնացման ուղղուած առաջադրանքներու նախագիծի բովանդակութեան հանդէպ:

Վերոնշեալ փաստաթուղթերուն մէջ տեղ գտած արձանագրութիւնները, իրենց ամբողջական պարունակին մէջ ուրիշ բան չեն, եթէ ոչ համայն հայութեան վրայ պարտադրուող նախապայմաններու շարան մը, ուր միակ տուժողը կը հանդիսանայ հայկական կողմը:

Նախագիծի արձանագրութեանց մէջ յստակ եւ նպատակաուղղուած ճիգ կայ հայ ժողովուրդի պատմական իրաւունքներու հետապնդման երթը հարուածելու եւ հայութիւնը բեւեռացումի մղելով պառակտելու:

Արձանագրութեանց հիմնական պայմաններու հայկական կողմի վաւերացումով,

Ա.- Հայութիւնը կը կորսնցէ իր բռնագրաւուած պատմական տարածքը վերականգնելու առիթը,

Բ.- Հայկական Յեղասպանութեան ճանաչման գծով քաղաքական գետնի վրայ, տարիներու ընթացքին իրագործուած ձեռքբերումները անդառնալի հարուած կը ստանան ու կը նսեմանան,

Գ.- Արցախեան հիմնահարցի ծիրէն ներս, բանակցային դիւանագիտական մրցավազքին մէջ, կը յայտնուինք յաւելեալ գիշումներ կատարելու պարտադրանքին դիմաց:

Հայ ժողովուրդի դարաւոր արդար դատին հակադրուող անձնատուղական այս նախագիծը վտանգաւոր հետեւանքներով լի է: Հայ ժողովուրդի ապագայ գոյատեւման եւ Հայաստանի ազգային անվտանգութեան ուղղուած հարուած է:

Ժողովրդային այս հաւաքին մասնակիցներս, կոչ կ'ուղղենք Հայաստանի ներկայ վարչակազմին, որ չենթարկուին իրենց վրայ պարտադրուող տարաբնոյթ միջազգային ճնշամիջոցներուն, եւ զգաստանալով ետ կենան նման նախագիծ մը յառաջ մղելու ու անոր տրամադրութիւններուն անձնատուր ըլլալու քայլէն: